



Siunnersuut uunga Inuussutissarsiutinik ilinniartitsinerit aamma inuussutissarsiutinik ilinniartitsinerup iluani pikkorissaanerit pillugit Inatsisartut inatsisaat

(Meeqqanut, Inuusuttunut, Ilinniartitaanermut, Kultureqarnermut, Timersornermut Ilageeqarnermullu Naalakkersuisoq)
(Siullermeerneqarnera)

Demokraatini naammagisimaarparput, inuussutissarsiutinik ilinniartitsinerup ukkatarineqarnera. Sammisaaq pingaartuuvoq, pingaaruteqaqaarmi, inuussutissarsiutinik ilinniakkat ilinniartunut aammalu suliffeqarfinnut pilerinartuutittuarnissaat. Tassunga atatillugu pingaaruteqarpoq paasissutissiissutigineqarnissaa, suliffissaaq qulakkeerneqarsinnaajuannangajattoq, inuussutissarsiutinik ilinniakkamik naammassisaqaraanni.

Taamatulli oqareerluta, siunnersuut una nammaginngilarput. Annertoorsuarnik allannguisoqartariaqarpoq, uagut Demokraatiniit siunnersuut akuerissagutsigu.

Siunnersuummi ajornartorsiutaanerpaasoq unaavoq, Naalakkersuisut brancheskolit siulersuisui atorunnaarsinniarmatigit akerlianik Nuummi Namminersorlutik Oqartussat allaffissuanniit qitiusumit aquttussanngorlugit. Akuttuvoq, eqiterinerup iluatsilluartarnera. Qularutigissagunangilarput kingunerissamagu, pisortat allaffeqarfianni sulisut amerlinissaat, tamannalumi qaquguluunniit. Akerlianilli sulissutigisariaqarparput, pisortat allaffeqarfiata sapinngisamik annikinnerunissaa.

Taassuma saniatigit isumaqanngilaq, piginnaasat immikkullu ilisimasat peerniarneri, atuarfiit pineqartut siulersuisuisa pigisaat. Piginnaasat, naatsorsuutigiinnarneqarsinnaanngitsut, Nuummi qitiusumik allaffeqarfimmi sulisut pigissagaat.

Isumaqataasinnaavugut, ajornartorsiutaammat, praktikkerfissanik amigaateqarneq, isumaqatiginngilarpulli, ajornartorsiutip qaangerniarnerani eqiterussinerup annertusarneratigit aammalu pisortat allaffeqarfianni sulisut amerlinerisigut qaangerneqarsinnaasoq. Uagulli isumaqarpugut, inuussutissarsiortunik suleqateqarnerulerneq aammalu inuussutissarsiortut kattuffiinik suleqateqarnerulerneq siunissami aqutissaasoq.

Nunatsinnili suliffeqarfiit tamaasa kajumissaarniarpagut suliffeqarfimmik aqqissuussaananerit misissoqqullugu paasiniarlugu praktikkertussanik amerlanerulaanik tigusinissaaq siunertaralugu. Praktikkerfissanik amigaateqartoqarpoq, inuiaqatigiinnilu akisussaaqataaermik takutitsinerussaaq, suliffeqarfiit praktikkertussanut amerlanernik inissanik nassaarsinnaasuuppata. Tamannami siunissami suliffeqarfinnut iluaqutaassaaq nunaqavissunik ilinniarluarsimasunik sulisoqalernermik kinguneqassammat.

Taamatut oqaaseqaateqarlunga nalunaarutigissavara, Demokraatit annertuumik isornartorsiormassuk siunnersuut maannakut isikkoqartillugu. Neriuppugut, ataatsimiititaliami sukumiisumik suliarineqarnerata



tamanna aqqikkumaaraa. Taamatut oqaaseqaateqarluta siunnersuutip aappasaaneerneqannginnermini ataatsimiitaliami susasaqartumi oqaluusereqqinneqarnissaa innersuussutigaarput.